

- मुख्यमंत्री भजनलाल शर्मा पंजाब अर हरियाणा मांय न्यारी-न्यारी नहर परियोजनावां रा बारा मांय जाणकारी लीनी-हनुमानगढ़ मांय पाणत अर पीवण सारू पाणी री पूर्ति रो जायजो लीनो।
- साल 2008 मांय जयपुर मांय व्ह्या एके पाछे एक बम धमाकां पाछे जिंदा बम मिलण रा मामला मांय दोषी साबित व्ह्या चार आतंकियां ने खास अदालत आजीवन कारावास री सज़ा सुणायी।
- राज्य सरकार जयपुर मांय टक्कर मार र भाग जावण रा मामला मांय मरण वाळां रा पिरवार वाळां ने पचास-पचास लाख रुपया रो मुआवज़ो देवण रो ऐलाण कीनो।
- प्रदेश मांय केई ठौड़ां पड़ रही ज़ोरदार गर्मी अर लू ने ध्यान राखता थकां प्रशासन जरूरी इन्तजामातू कीना।
- प्रधानमंत्री नरेन्द्र मोदी मुद्रा योजना ने कारोबारियां ने मजबूत बणावण सारू मौन क्रांति बतायो।

000

मुख्यमंत्री भजनलाल शर्मा कह्यो है के किसानों रे मजबूत बणबा ऊं ई प्रदेश ताकतवर बनेला। वे आज हनुमानगढ़ मांय जनसभा ने संबोधित कर रह्या हा। श्री शर्मा कह्यो के किसानों ने पाणत सारू जरूरी पाणी मुहैया करावण बाबत न्यारी-न्यारी नहर परियोजनावां ने मजबूत बणावण रो फैसलो करी ज्यो है। वे कह्यो के इन्दिरा गांधी नहर परियोजना ने और चोखी बणावण सारू 3 हजार 400 करोड़ रुपया रा काम कराया जावेला। मुख्यमंत्री कह्यो के ई सागे ई भाखड़ा अर गंग नहर ऊं जुड़ी समस्यावां आगी करण सारू ई जरूरी काम कर्या जावेला।

मुख्यमंत्री आज पंजाब मांय न्यारा-न्यारा नहर हलकां रो हवाई दौरा कीनो। श्री शर्मा हेरिके हैड मांय मल्लेवाला हैड, बल्लेवाला हैड, बीकानेर कैनाल, फिरोजपुर फीडर अर इंदिरा गांधी नहर रो जायजो लीनो। ई दौरान मुख्यमंत्री पाणत ऊं जुड़ी न्यारी-न्यारी परियोजनावां रा हालात अर पाणी रा बहाव रा बूता रा बारा मांय ई जाणकारी लीनी। श्री शर्मा हरियाणा रा लोहगढ़ बंधा रो ई जायजो लीनो। वे बांध रा हालात अर पाणी भेलो करण रा बूता समेत न्यारा-न्यारा पहलुआं री जाणकारी लीनी। जल संसाधन मंत्री सुरेश सिंह रावत ई वां सागे हा। मुख्यमंत्री रो काल श्रीगंगानगर ज़िना रा दौरा रो कार्यक्रम है। वे नुवी धान मंडी मांय सरकारी मोल माथे सरसों री खरीद रा काम री सरूआत करेला।

000

13 मई 2008 मांय जयपुर मांय एके-पाछे-एक आठ बम धमाकां पाछे और ज़िन्दा बम मिलण रा मामला मांय अदालत मांय दोषी साबित व्ह्या चार आतंकियां ने आजीवन कारावास री सज़ा सुणायी ज्यी है। ई मामला री सुणवाई कर रही खास अदालत रा जज रमेश कुमार जोशी 600 पेज रा फैसला मांय सैफुर्रहमान, मोहम्मद सैफ, मोहम्मद सरवर आजमी अर शाहबाज अहमद ने दोषी ठहराया। दोषियां ने सज़ा देवण रा बारा मांय व्ही बहस रे दौरान सरकारी वकील सागर तिवड़ी अदालत मांय दोषियां ने बच्योड़ी ज़िन्दगी ताई जेल मांय ही राखण री मांग कीनी। वे कह्यो के ओ घणो गंभीर अपराध है अर ऐड़ा अपराधियां सागे किण ई हालात मांय नरमी नी बरती जावणी चाहिजे। अदालत रा फैसला पाछे सरकारी वकील खबरनवीसां ने बतायो के कोर्ट ई मामला ने घाणो गंभीर मानता थकां आतंकवाद ने समाज सारू खतरा बतायो। ध्यानजोग है के जीवतो बम चांदपोल बाज़ार रा एक गेस्ट हाउस कने मिल्यो हो, जिण ने धमाका ऊं महज 15 मिनट पैली बेकार कर दियो ज्यो हो। आं धमाकां रे कारण 71 जणां री मौत व्हे ग्यी ही अर 185 जणा ज़ख्मी व्हे ग्या हा।

000

राज्य सरकार काल जयपुर मांय टक्कर मार र भाग जावण रा मामला मांय मरण वाळां रा पिरवार वाळां ने पचास-पचास लाख रुपया रो मुआवज़ो देवण रो ऐलाण कीनो है। ई सागे ई मरण वाळां रा आश्रितां ने संविदा रा आधार ऊं नौकरी ई दी जावेला। ध्यानजोग है के ई हादसा मांय तेज़ रफ़्तार कार कानी ऊं टक्कर मार देवण रे कारण तीन जणां री मौत व्हे ग्यी ही अर पांच जणा ज़ख्मी व्हे ग्या हा, ज्यां रो जयपुर रा सवाई मानसिंह अस्पताल मांय ईलाज चाल रह्यो है। पुलिस रे मुजब काल तेज़ रफ़्तार ऊं गाड़ी चला र ले जा रह्यो कार ड्राइवर नाहरगढ़ रोड़ माथे पैदल जा रह्या मुसाफिरां ने कुचल दीना हा अर केई गाड़ियां ने टक्कर मार दीनी ही। हादसा री बगत गाड़ी चलावण वाळा रे नशा मांय व्हेवण री जाणकारी मिली है। मौके मौजूद लोग वां ने पकड़ र पुलिस ने सूप दीनो। प्रशासन हालात ने ध्यान राखता थकां नाहरगढ़ अर आरे-सारे रा हलका मांय और पुलिस ज़ाब्तो लगायो है।

भारतीय जनता पार्टी रा नेता ज्ञानदेव आहूजा ने पार्टी री प्राथमिक सदस्यता ऊं निलंबित कर दिया ज्या है। ई सागे ई पार्टी श्री आहूजा ने कारण बताओ नोटिस जारी कर र तीन दिन मांय जवाब मांग्यो है। विधानसभा मांय विपक्ष रा नेता टीकाराम जूली रा बारा मांय ज्ञानदेव आहूजा कानी ऊं करी ज्यी आपत्तिजनक टिप्पणी पाछे पार्टी ओ फ़ैसलो कीनो।

राष्ट्रीय पोषण पखवाड़ो आज सरु व्ह्यो। महिला अर बाल विकास मंत्रालय री ओर ऊं मनाया जा रह्या ई पखवाड़ा रे दौरान बच्चां अर महिलावां ने कुपोषण ऊं बचावण सारु न्यारा-न्यारा कार्यक्रम राख्या जा रह्या है। पोषण पखवाड़ा रा तैत प्रदेश मांय केई जागरूकता कार्यक्रम राख्या जा रह्या है। कोटपूतली-बहरोड़, झालावाड़ अर सवाईमाधोपुर समेत केई ठौड़ां आज जागरूकता रैली निकाली ज्यी अर रंगोली सजा र पोषण रो संदेश दियो ज्यो।

प्रदेश मांय घणखर ठौड़ां घणो तावड़ो पड़ रह्यो है। मौसम विभाग बाड़मेर ज़िला सारु हीटवेव रो रेड अलर्ट अर छह ज़िलां सारु ऑरेंज अर 12 ज़िलां सारु येलो अलर्ट जारी कीनो है। घणखर ठौड़ां अधिकतम तापमान 40 डिग्री सेल्सियस ने पार कर ग्यो है। बाड़मेर मांय लगातार चार दिन ऊं तापमान 45 डिग्री सेल्सियस ऊं ऊंचो दर्ज कर्यो जा रह्यो है। लारला 24 घंटां मांय चित्तौड़गढ़, जैसलमेर, बीकानेर अर कोटा मांय अधिकतम तापमान 44 डिग्री सेल्सियस ऊं ऊंचो दर्ज करी ज्यो। मौसम विभाग 9 अप्रैल ताई गर्म रातां रो 'वार्म नाइट अलर्ट' जारी कीनो है। 10 अप्रैल ऊं इण मांय कुछ राहत मिलण रा आसार है, हालांकि श्रीगंगानगर, झुंझुनूं, अलवर अर भरतपुर ज़िलां मांय तेज तावड़ो पड़बा रा आसार है। 11 अप्रैल ऊं मौसम ओजू बदलण रे कारण गर्मी ऊं कुछ राहत मिलण री संभावना है। म्हाणा बालोतरा खबरनवीस बतायो के वठे ज़बरदस्त गर्मी अर लू रे कारण जिन्दगी माथे घणो असर पड़ रह्यो है।

तेज गर्मी ऊं बचाव सारु प्रशासन री ओर ऊं ज़रूरी इंतजामात् कर्या जा रह्या है। झालावाड़ मांय लू ऊं बचाव सारु चिकित्सा अर स्वास्थ्य विभाग ज़रूरी दिशा-निर्देश जारी कीना है। न्यारी-न्यारी ठौड़ां ओ. आर.एस. रा घोळ रा काउंटर ई लगाया जा रह्या है। पाली मांय सड़कां माथे पाणी रो छिड़काव करायो जा रह्यो है। म्हाणा कोटा खबरनवीस बतायो के ज़िला कलेक्टर न्यारी-न्यारी ठौड़ां आश्रय स्थल बणावण रा हुकम दीना है।

डूंगरपुर मांय ज़िला कलेक्टर अलकारां सागे मीटिंग कर र चिकित्सा, पेयजल अर दूजा महकमां रा अहलकारां ने तालमेल ऊं काम करण बाबत् कह्यो।

प्रधानमंत्री मुद्रा योजना सरु व्ह्यां आज 10 साल पूरा व्हे ग्या। ई मौके प्रधानमंत्री नरेंद्र मोदी कह्यो के सरकार कारोबार करण री मंशा राखण वाळा हर एक जणा ने कारोबार सारु आसानी ऊं कर्ज मुहैया करावण सारु गतिशील व्यवस्था माथे ध्यान देती रेहवेला। प्रधानमंत्री नरेन्द्र मोदी मुद्रा योजना ने कारोबारियां ने मज़बूत बणावण सारु मौन क्रांति बतायो। सोशल मीडिया पोस्ट रे ज़रिए श्री मोदी कह्यो के ई योजना ऊं केई लोगां रा सपना सांचा व्ह्या है। प्रधानमंत्री ई योजना रो फ़ायदो लेवण वाळां सागे वां रा रेहवास माथे बातचीत ई कीनी। ई दौरान श्री मोदी कह्यो प्रधानमंत्री मुद्रा योजना रो फ़ायदो लेवण वाळां मांय 70 फीसदी महिलावां है।

श्री मोदी कह्यो के ई योजना रो मकसद नौजवानां ने मज़बूत बणा र नौकरी मांगण वाळां री बजाए नौकरी देवण वाळा बणबा लायक बणावणो है।

मुद्रा योजना ऊं प्रदेश मांय ई मोटी तादाद मांय महिलावां सागे केई लोगां ने फ़ायदो मिल्यो है। ई सागे ई अनुसूचित जाति, जनजाति अर अल्पसंख्यक तबकां री जनता ने खुद रा काम-धंधा सरु करण बाबत् माली मदद मुहैया करावण सारु आ योजना घणी फ़ायदेमंद साबित व्ही है।